

**BUKU PARTONGGOAN
LINGKUNGAN-RUMAHTANGGA
BULAN JULI 2026**

**RUMAH TANGGA KATOLIK MARDALAN RIAP
MANANGIHON, MARSIPATOGUHON, ANJAH
MANGAMBILANHON GABE RUMAHTANGGA
NA MARKARAKTER**



**KOMISI KELUARGA
KEUSKUPAN AGUNG MEDAN
2026**

Hata Pamungkah

Bani na mangalo-alo Minggu Rumahtangga i Keuskupan Agung Medan 2026, Komisi Keluarga KAM pasirsirhon Buku Partonggoan Lingkungan/Rumahtangga sadokah bulan Juli 2026. Arap uhur nami buku partonggoan on boi ipakei bani tonggo/ibadat bani haganup lingkungan/rumahtangga na adong i paroki Keuskupan Agung Medan.

Tema partonggoan on marondolan hubani Sinode Keuskupan Agung Medan VII: Manangihon, Marsipatoguhon, Mangambilanhon. Rumahtangga isobut do ia Kuria rumahtangga, janah porlu do tumang ia bani na manubuhkon haporsayaon ampa biak ni ganup pagori. Ibagas semangat hasadaon ni Keuskupan Agung Medan, iontang do rumahtangga Katolik ase totap riap mardalan, manangihon ibagas uhur na buha, marsipatoguhon ibagas holong ni Kristus, pakon mangambilanhon Ambilan Na Madear marhitei goluh siganup ari.

Tema-tema na ipasirsir bani 4 (ompat) partumpuan on aima :

1. Rumahtangga Mardalan Riap Manangihon.
2. Rumahtangga Mardalan Riap Marsipatoguhon.
3. Rumahtangga Mardalan Riap Mambaritahon.
4. Rumahtangga Katolik na Mardalan Riap pakon Markarakter.

Medan, 1 Juni 2026

RP. Andreas Budianto, OFMConv

Ketua Komisi Keluarga

TONGGO SINODE DIOSESAN VII KEUSKUPAN AGUNG MEDAN

Naibata Bapa, Bahni sagala Hagoluhan. Ipuji janah mangkatahon diateitupa do hanami hu Bamu, halani tongtong do itogu Ham Kuria-Mu, Keuskupan Agung Medan ibagas sondang ni holong ampa hasintongan-Mu. Bani panorang na gok idop ni uhur on, iontang Ham do hanami umat pinilih-Mu ase martuppu bani Sinode VII Keuskupan Agung Medan janah iontang Ham do hanami ase riap mardalan manangihon, marsipatoguhon ampa mangambilanhon. Ipangindo hanami, ase pardalanan ni Sinode on gabe panorang na mapansing bani haganup umat-Mu na dob idilo-Mu ase riap mardalan marsitangitangian pakon sora ni Tonduy Napansing, patoguhkon haporsayaon pakon pangarapan marhitei parsaoan na sintong, ampa mangambilankon Ambilan Na Madear ibagas semangat perutusan ampa paridop ni uhur. Andohar marhitei panogu-noguon ni Tonduy na Pansing, pangurupion pakon tonggo ni Inangnami, sonai age tonggo ni Beato Dionysius pakon Beato Redemptus, Sinode on boi idalankon romban hubani harosuh-Mu ase Kuria Keuskupan Agung Medan boi gabe sada tanda na taridah pasal panrohni ni Harajaon Mu anjaha gabe sada Umbul Hanaibataon i tengah-tengah ni dunia on.

PERTUPPUAN PERLOBEI
RUMAH TANGGA MARDALAN RIAP
MANANGIHON

1. Doding Pamungkah

PBN No. 574: "Megah Ma Uhurta"

2. Tanda Silang

P. Ibagas goranni Bapa, pakon Anak pakon Tonduy
Napansing

U. Amen

P. Idop ni uhur ampa damei humbani Naibata Bapanta
ampa humbani Tuhanta Jesus Kristus menghasomani
hita

U. Sonari das ronsi sadokah ni dokahni

3. Hata Pamungkah

Nasiam sanina na hinaholongan, bani pardalanan ni haporsayaonta, gati do hita sibuk mardalan pakon marhorja, janah lang idingat hita maronti tongkin manangihon. Bani panorang on, marhitei kisah ni si Maria pakon si Marta, iarahkon Naibata do hita ase mamparimbagaskon artini gabe "Rumahtangga na Manangihon".

Ipilih si Maria do hundul ilambung nahei ni Tuhan janah manangihon hata-Ni. Ia mangajarhon hubanta bahwa manangihon sedo pitah manangar sora, tapi mambuha uhur manjalo harosuh ni Naibata. Buhai hita ma uhur ampa pingkiranta, ase marhitei ambilan in, lambin iontang hita gabe sada rumahtangga na

mambotoh manangihon Naibata, marsitangi-tangian, ampa manangihon pandiloon ni goluhta.

4. Tonggo Pamungkah

P. Martonggo ma hita

Bapa Parholong na So Tarimbang, ipuji janah ihatahon hanami do tarima kasih halani holong ampa pangiringiring-Mu ase boi hanami martumpu sadari on gabe sada rumahtangga na banggal i lingkungannami. Sadalan hubani tonduy ni Sinode Keuskupan Agung Medan, sihol do hanami riap mardalan ibagas haporsayaon. Marhitei pambahenan ni si Maria pakon si Marta, paingat Ham ma hanami ase ulang maporus uhur nami bani kesibukan tumang, tapi ase tongtong mambere panorang laho manangihon sora-Mu ibagas tonggo pakon hata-Mu, janah marsitangi-tangian ma hanami ibagas uhur na buha anjaha na gok holong. Marhitei Tuhannami Jesus Kristus, AnakMu, na manggoluh anjaha manrajai rup pakon Ham ibagas parsaoan ni Tonduy Napansing, Naibata, sadokah ni dokanhni.

U. Amen

5. Sibasoa Humbani Injil Lukas 10:38-42

L. itangar hita ma hata ni Tuhan mangihutkon Lukas

L. Sonaima hata ni Tuhan

L. Puji-pujian ma Bamu ale Kristus

6. Ambilan

Nasiam, hasoman na hinaholongan tonduy ni Sinode Keuskupan Agung Medan mangarahkon hita ase riap mardalan, marsitangi-tangian, marsipatogu-toguan, ampa mangambilankon holong ni Naibata bani goluhta

siganup ari. Rumahtangga aima “Kuria na etek” na parlobei sahali ihagoluhkon tonduy on. Bani kisah ni si Maria pakon si Marta, taridah do gambaran na jelas pasal sonaha dua sisi ni goluh haporsayaon aima manangihon ampa mangidangi maningon sadalan do, lang boi isirangkon. Gati tubuh sungkun-sungkun: Marsalah do si Marta bani pangabakni ai? Balosni: Lang, si Marta lang marsalah. Ibagas borsih ni uhur do si Marta manjalo Jesus hu rumahni, ringgas marhorja laho mambere pambahenan na sidearan bani Tuhan ampa bani tamuni ai. Pambahenanni aima holong pakon tanggungjawab. Anggo lang si Marta na mangidangi, tontu lang dear pardalanan ni parmanganan ai, janah lang dear pangahap ni halak pasal parroh ni Jesus. Mulia anjaha porlu do panghobasion ni si Marta. Na iondolhon Jesus sedo horja ni si Marta ai sandiri, tapi isi ni uurni do. Gabe holsohan, bulinsah, boratan tumang do si Marta, halani ai magou damei janah igugat do kakakni janah ipinsang ia do Jesus. Kesibukanni mambahen ia lupa bahwa Tuhan na iidangini sasintongni mangontang hadameion, sedo holsoh.

Ibagas semangat Sinode, na mangontang hita ase riap mardalan ibagas na manangihon, porsu ni si Maria pakon si Marta nington seimbang, saling manggoki janah saling mandukung: 1. Porsu ni si Maria: Panorang “Marsaran janah Manangihon”, on ma onjolanni. Paima manlahohon, porlu do hita manangihon. Ipilih si Maria do hundul i lambung nahei ni Jesus, manangihon hata-Ni, janah ipaturut do uhur-Ni parlobei iparmudu-mudu Naibata. Ibagas rumahtangga pakon lingkungan na

mardalan riap, artini aima mambere panorang laho martonggo, mamparimbagaskon hata ni Naibata, anjaha marsitangi-tangian. Artini: Maningon ai do sipalobeihonon pakon pusat. Anggo lang sonai, pangkobasionta gabe koring, loja, janah urah iboan-boan emosi songon si Marta. 2. Porsi Marta : Panorang “Jongjnong janah Mangidangi”, on ma buah ni na mambogei. Anggo domma igoki uhurta bani holong ni Naibata, idilo do hita mambaritahon holong ai marhitei pambahenan na taridah. Si Marta manggambarhon tugas-tugas rumahtangga, tanggungjawab parhorjaan, pakon pangidangion i tengah-tengah ni masyarakat.

Bagianni: a. Maningon janah ituruskon gabe tanda ni holong do ai. Pangkobasion na maronjolan bani uhur na dob itangihon Naibata gabe hampung, gok malas ni uhur, janah lang manuntut balasan. b. Ulang ma hita pitah “Maria” na sipsip martonggo tapi lupa mampardiateihon haporluan ni halak na legan na loheian, na boritan, atap na mamorluhon pangurupion. c. Ulang ma homa hita pitah “Marta” na sibuk marhorja tapi lang onnga mambere panorang laho martonggo, marsaran, marsitangi-tangian. Rumahtangga na berkarakter aima rumahtangga na mambotoh sadihari panorang sip hundul manangihon sora ni Naibata ampa sora ni anggota keluarga, janah mambotoh sadihari jongjong janah mangidangi ibagas holong. Anggo domma seimbang dua porsi in, ijai ma hita gabe sada rumahtangga na mamboan holong hamalumon, songon tonduy ni Sinodetta on. Jesus mangkatahon: “Sada do na porlu.” Sada ai aima parhasomanan pakon-Si. Atap na

hundul-hundul hita manangihon songon si Maria, atap sibuk marhorja songon si Marta, haganupan maningon marurat ibagas holong hubani Naibata ampa hubani hasoman.

Riap ma hita mardalan, marsipaingatan, marsiurupan, ase ulang adong na mangahap borat punjung. Bahen hita ma panorang manangihon i nahei ni Naibata gabe “minsk” na manggoki semangatta mangidangi ibagas malas ni uhur.

Andohar lambin matoras ma rumahtangganta sonai age haganup umat Keuskupan Agung Medan ibagas na menyeimbangkan manangihon pakon mangidangi, ibagas na laho patubuhkon bohi na gok holong bani Kuria in.

7. Manluarhon Pandopot ampa Pangahap (Sharing)

- P.** Sonari pabagas hita ma ambilan on marhitri sungkunsungkun na i toruh on laho manogu-nogu mambagihon pagalaman.
1. Nantigan ma panorang na sidearan janah tenang bani keluarganta laho maronti janah manangihon Naibata marhitei na mambasa Bibel atap martonggo?
 2. Situasi atap pangahap aha do na gati mambahen langurah hita manangihon pandapot atap holsoh ni anggota rumahtangga na legan.
 3. Aha do tanda-tanda na iahap hita sanggah Naibata marsahap atau manogu-nogu langkahta bani goluh on?

8. Mambahen Panriahan Laho Patorsahon (Aksi Nyata)

- P.** Atur ma panorang na tenang atap mambasa Bibel na pondok otinik 5-10 menit tiap ari paima mamungkah atap mandobkon sada horja.
- P.** Mandalankon aturan: “Sada marsahap, na sada nari manangihon” sanggah mansahapkon atap pasaloseihon parsoalan, lang pala manlanglangi parsahapan.
- P.** Ganup rumah tangga marjanji laho lambin parduli janah manungkun: “Sonaha ahu boi mangurupi nasiam?” atap “Sonaha do pangahapmu sadari on?”

9. Tonggo Riap

a. Bani Ganup Pamimpin Kuria

Andohar ipargogohi Bapa in ma haporsayaon ni Uskup, Malim, Diakon sonai age haganup pangurus Kuria. Sai gabe sitiruon ma sidea na tangi manangihon sora ni Tonduy Napansing pakon sora ni halak na iondoskon bani sidea, janah boi manogunogu hita ase riap mardalan ibagas parsaninaon na orot.

Riap ma hita mangelekhon...

b. Bani Ganup Rumahtangga

Ase ganup rumah tangganta gabe "Kuria na etek" na jenges. Urupi Ham ma hanami ase ulang sibuk hanami bani dirinami sandiri, tapi marsibere-bere ma hanami, marsitangi-tangian ma ungut-ungut ampa malas ni uhur ni hasoman, janah riap manjumpahkon siporsanon ase tongtong damei-Mu mangkasomani hanami.

Riap ma hita mangelekhon...

c. Bani Ganup Pamimpin Bangsa

Sai ibere Naibata ma hubani Presiden, menteri, gubernur, bupati/walikota pakon ganup pejabat negara uhur na pandei janah toruh maruhur. Sai tongtong ma sidea mardalan riap pakon rayat, podas manangihon sura-sura ampa haporluan ni simbuei, janah mangondolhon hadearon ganup masyarakat marimbang haporluan pribadi atap kelompok.

Riap ma hita mangelekhon...

d. Tonggo hubani haporluanni lingkungan...

Riap ma hita mangelekhon...

P. Riap ma hita martonggo “Tonggo Sinode Keuskupan VII Keuskupan Agung Medan” (hal 2)

10. Tonggo Ham Bapanami

P. Padomu hita ma tonggo pangindoan on pakon tonggo na niajarhon ni Jesus sandiri: Ham Bapanami na i nagori atas...

11. Kolekte

PBN No. 254: "Sai Jalo Ham Siluahnami".

12. Tonggo Panutup

P. Martonggo ma hita:

Bapa Naibata Pargogoh na so tarimbang, Tarimakasih ma Bamu halani domma ihasomani Ham hanami sadokah partonggoan on. Domma ipaingat Ham hanami marhitei barita ni si Maria pakon si Marta, sonaha porluni mambere panorang laho manangihon sora-Mu sonai age sora ni sanina botounami. Ham Tuhan, pasu-pasu Ham ma langkah nami ase boi torus hanami mardalan ibagas holong. Urupi Ham ma hanami ase gabe rumahtangga na tontong mambuha uhur, sabar manangi-

nangi, janah marsipatogu-toguan, ase damei-Mu
tongtong mangkasomani rumah tangga nami bei.
Marhitehitehon Kristus Tuhannami

U. Amen

Atap Tonggo ni Sada Rumah Tangga: PBN No. 164

13. Pasu-Pasu

P. Tuhan in manghasomani hita

U. Sonari das ronsi sadokah ni dokahni

P. Sai ipargogohi, ihasomani, ipatoguh janah ipasu-pasu
Naibata Pargogoh na so tarimbang ma hita ase
marsitangi-tangian ibagas goran ni Bapa, pakon Anak
ampa Tonduy Napansing.

U. Amen

P. Nasiam hasoman na hinaholongan, marhiteihonni on
partumpuan na parlobei na martemahon rumahtangga
mardalan riap managihon domma salosei.

U. Tarima kasih ma bani Naibata

14. Doding Panutup

PBN No.528 : "Riap Hita Janah Sauhur" / "Doding
Sinode"

PARTUPPUAN PADUANHON
RUMAH TANGGA MARDALAN RIAP
MARSIPATOGUHON

1. Doding Pamungkah

PBN NO. 575 : "Ambit Boi Nadodingkon"

2. Tanda Silang

P. Ibagas goranni Bapa, pakon Anak pakon Tonduy
Napansing

U. Amen

P. Idop ni uhur ampa damei humbani Naibata Bapanta
ampa humbani Tuhanta Jesus Kristus
menghasomani hita

U. Sonari das ronsi sadokah ni dokahni

3. Hata Pamungkah

P. Ondoskon hita ma puji-pujian ampa tarima kasih
hu lobei ni Naibata Bapa pargogoh na so tarimbang
in. Bani panorang on, idilo do hita ase martumpu
sedo sada-sada hansa, tapi ai ma sada rumahtangga
na banggal umat ni Naibata. Tema partonggoanta
na parlobei aima "Rumahtangga mardalan riap
managihon". Andohar ma boi hita haganupan
mangkorjahon ai dear, aima manangar sora ni
bapa, inang, niombah tarlobih sora na humbani
Naibata.

Tema ni partonggoanta sadari on aima:
"Rumahtangga mardalan Riap Marsipatoguhon".
Bani pardalanan ni haporsayaonta, gati do iahap
hita loja, ragu janah punjung hita mandompakkon

sitaronon. Tapi, Hata ni Naibata paingatkon hita pagori ni aima na sada Angkula ni Kristus do hita. Lang hita mardalan sandiri. Riap mardalan do hita, marsijoloman tangan, marsipatogu-toguan, janah marsiurupan.

Sanggah dong na galek, na gogoh do na mangurupisi. Sanggah dong na putus asa, dong homa na mambere pangarapan. Andohar ma marhitei partonggoan rumahtangga on, lambin marhasadaon uhurta, lambin toguh haporsayaonta, janah lambin ibotoh hita na marsanina do hita, na marsihaholongan bahen hasangapon ni Goran-Ni. Buhai hita ma uhur ampa pingkiranta manjalo horja holong-Ni sonari.

4. Tanggo Pamungkah

P. Martonggo ma hita

Bapa Naibata na parholong,
tarimakasih ma Bamu halani domma ipatumpu
Ham hanami ijon gabe sada rumahtangga Katolik.
Seng itompa Ham hanami ase manggoluh ibagas
punjung, tapi ase manggoluh ibagas parsaoran
ampa holong.

Ham Tuhan Jesus, Ham do Dalan na sintong.
Sadari on roh ma hanami marhiteihon tema:
“Rumahtanggga Mardalan Riap Marsipatoguhon”.
Patoguh Ham ma uhurnami ase ibotoh hanami na
marsanina do hanami. Bere Ham ma bannami uhur
na marpangunsandeian laho marsisarihon, tangan
na sirsir marsiurupan, ampa hata na boi
patoguhkon hasoman. I tongah-tongah ni dunia na

gok tantangan on, ulang ma namin sahalak hanami mardalan. Sai pasada Ham ma langkahnami, patotap Ham ma parsaninaonnami, ase ibagas haporsayaon na toguh boi hanami riap mardalan dompak Ham. Pindoon nami, pasu-pasu Ham ma partonggoan rumah tangga on. Paborsih Ham ma uhur pakon pingkiran nami, ase sagala na hinorjahon ampa na hinatahon nami sadari on gabe pasu-pasu bani hasoman ampa tonggo nami tarjalo ilobei-Mu. Marhiteihon Tuhannami Jesus Kristus, Anak-Mu, na manggoluh anjaha manrajai rup pakon Ham ibagas parsauran pakon Tonduy Napansing, Naibata, ronsi sadokah ni dokahni.

U. Amen

5. Sibasaon Humbani Injil Yohanes 20:19-23

L. Itangar hita ma hata ni Tuhan mangihutkon Yohanes

L. Sonaima hata ni Tuhan

L. Puji-pujian ma Bamu ale Kristus

6. Ambilan

Bani pambasaan Ambilan Na Madear sadari on, taridah do situasi ni susian bani borngin parlobei dob puho Jesus. Martumpu ma sidea bani sada kamar na ikunsi gomos labah ni. Mase? Halani mabiar do sidea.

Iahap sidea punjung, galek, janah bingung. Sidea mangahap domma itadingkon janah mabiar. Tapi, aha do na masa? Roh ma Jesus jongjong hu tongah-tongah ni sidea. Jesus roh sedo laho manguhumi, tapi laho mambere damei pakon patoguhkon.

Adong tolu ondolan na penting humbani ambilan on na sadalan hubani tema on aima: Mardalan Riap Marsipatoguhon.

1. Hagogohon adong ibagas na marsada. Susian lang marlintun huja pe sahalakni. Martumpu ma sidea. Age pe mabiar sidea tapi hasadaon ai gabe ianan na aman. Sonai homa hubanta sarumahtangga na porsaya. Lang tardilo hita mardalan bani dalan haporsayaon on sahalak hita. Anggo riap mardalan hita, happung do iahap hita naborat ai, janah biar boi marubah gabe habaranion.
2. Roh do Jesus i tongah-tongah ni Parsaoranta. Jesus mangkatahon: “Damei ma bannima!” Anggo domma marsada uhur janah martumpu, roh do Jesus i tongah-tongahta. Roh do Ia laho padaohkon biar, manggantihkon pandoleian gabe pangarapan, janah manghosahkon Tonduy-Ni na Pansing ase margogoh hita. Haporsayaonta lambin toguh lang pitah halani tonggonta sandiri, tapi halani iahap hita do parrohni Naibata ibagas pars Moran pakon sanina.
3. Hita isuruh marsipatoguhon. Dobkonsi mambere damei Jesus mangkatahon: “Songon parsuruh ni Bapa in Ahu, sonai do suruhon-Ku hanimu.” Dob ai isompulhon ma Tonduy Napansing hubagas sidea. Artini, ulang iponopkon hita kuasa na ijalo hita humbani

Naibata banta. Hita idilo gabe “tangan pakon nahei” ni Jesus hubani halak na legan. Anggo galek sanina botounta, toguh ma hita janah mangurupi sidea. Anggo dong na sangsi, ipapos hitama uhurni. Anggo dong na madabuh, isurdukkon hita ma tanganta laho papuhohonsi. Marsisasapan dousa janah marsijaloan do hita, songon na binahen ni Naibata hubanta.

7. Manluarho Pandapot ampa Pangahap (Sharing)

P. Sonari pabagas hita ma ambilan on marhitei sungkun-sungkun na i toruh on laho manogugu mambagihon pangalaman.

1. Sadihari do parpudi sahali ham mangahapkon ipargogohi atap ipargogohi anggota keluarga na legan? Aha do na ihatahon atap na ihorjahon sidea?
2. Aha do hata atap pambahenan na gati seng sangaja ihatahon/ihorjahon hita janah na ujugni mambahen borit atappe patoruhkon semangat keluarga?
3. Anggo dong anggota keluarga na ibagas dousa atap ibagas hasunsahan, sonaha do sibahenon na maningon idalankon hita domu hubani podah ni Tuhan?

8. Mambahen Panriaan Laho Patorsahon (Aksi Nyata)

P. Ubah hita ma sara marsahap: Gantihon ma kritik/hata na kasar marhiteihon podah na mambangun (Contoh: Dari pada mangkatahon

"Sai salah do ham", ubah ma gabe "Pindahi hita ma cara na lobih dear").

P. Bahen ma hasomalan “Sada Puji-pujian Ganup Ari”: Ganup anggota keluarga maningon mamuji atap manghargai hadearon ni sada anggota keluarga na legan tiap ari.

P. Marjanji laho marsitonggoan secara khusus, lang pitah tonggo umum, tapi tonggohon ma parsoalan atap tantangan na idompakkon bei.

9. Tonggo Riap pokon Tonggo

a. Hubani pambobai ni Kuria:

Bapa, martarimakasih do hanami bani pambobai ni Kuria na tongtong mampardiateihon ampa mangojur hanami. Bere Ham ma bani sidea Tonduy na gok hapentaran ase margogoh sidea pataridahkon Kristus i tengah-tengah ni dunia on janah mangojur jolma mambahen Hata-Mu gabe pusat ni goluhni i dunia on.

Riap ma hita mangelekhon...

b. Hubani na mambobahon negara on:

Bapa, hasomani Ham ma na mambobahon negara on bani horja mangidangi laho mambobahon negara nami on. Pasu-pasu Ham ma sidea ase boi mambobahon ibagas hauhuron, toruh ni uhur ampa semangat pangidangion na sintong. Pagara Ham ma tonduy pengorbanan bani sidea, gabe hasaksian haporsayaon bani holong-Mu na paluahkon in.

Riap ma hita mangelekhon...

c. Bani misionaris, guru agama ampa katekis:

Ale Bapa, martarimakasih do hanami bani dilo-dilo na sangap na binere-Mu hubani sidea na mangondoskon goluhni laho mangambilankon Ambilan Na Madear ampa manogu-nogu bangsa-Mu. Sadarhon Ham ma bani parambilan na madear, paboa Tonduy-Mu do na marhorja janah na manjumpahkon uhur ni na mangindahi hasintongan in. Patoguh ma usaha ampa hapokkuton ni sidea bani tugas marambilan laho membangun parsahapan ampa hasaksian haporsayaon bani pambahenan ni sidea ari-ari.

Riap ma hita mangelekhon...

d. Bani hita na martuppu on:

Bapa, pasu-pasu Ham ma hanami, umat-Mu na martumpu ijon, mangambilanhon pambahenan haluahon-Mu bani ganup jolma. Sai lambin toguh ma haporsayaon, pangarapan ampa holongnami bani horja haluahon-Mu bani ganup jolma. Togu Ham ma hanami ase tongtong manggoluh domu hubani hata-Mu sandiri janah patalup Ham ma hanami ase boi marsipargogohan.

Riap ma hita mangelekhon...

P. Riap ma hita martonggo “Tonggo Sinode Keuskupan VII Keuskupan Agung Medan” (Hal 2)

10. Tonggo Ham Bapa Nami

P. Padomu hita ma tonggo pangindoan on pakon tonggo na niajarhon ni Jesus sandiri: Ham Bapanami na i nagori atas...

11. Kolekte

PBN No. 585: "Tuhan, Na HumbaMu do"

12. Tanggo Panutup

Naibata Bapa, Pargogo na so tarimbang anjaha gok hasangapon, martarimakasih do hanami umat-Mu halani tongtong do Ham roh janah mangkasomani hanami bani partumpuan on. Urupi Ham ma hanami ase botul-botul marlimbuah ma partumpuan on bani goluh nami ase marpatorsaon janah taridah marhitei horja holong songon na niajarhon ni Anak-Mu. Hasomani Ham ma hanami tongtong ase totap hanami setia mandalankon harosuh-Mu. On ipadas hanami hu Bamu Marhitei Kristus Tuhannami,
Amen.

13. Berkat

P. Tuhan in manghasomani hita

U. Sonari das ronsi sadokah ni dokahni

P. Sai ipargogohi, ihasomani, ipatoguh janah ipasupasu Naibata Pargogoh na so tarimbang ma hita ase gabe rumahtangga na mardalan riap marsipatoguhon ibagas goran ni Bapa, pakon Anak ampa Tonduy Napansing.

U. Amen

P. Nasiam sanina na hinaholongan, marhiteihonni ai partumpuan na paduahon na martemahon rumahtangga mardalan riap laho marsipatoguhon domma salosei.

U. Tarima kasih ma bani Naibata

14. Doding Penutup

PBN No. 599: "Tuhan Do Marmahan Ahu"/ "Doding Sinode"

PERTUPPUAN PATOLUHON
RUMAH TANGGA MARDALAN RIAP
MANGAMBILANHON

1. Doding Pamungkah

PBN No. 573: "Sai Martuah Do Ganup"

2. Tanda Silang

P. Ibagas goranni Bapa, pakon Anak pakon Tonduy
Napansing

U. Amen

P. Idop ni uhur ampa damei humbani Naibata Bapanta
ampa humbani Tuhanta Jesus Kristus
menghasomani hita

U. Sonari das ronsi sadokah ni dokahni

3. Hata Pamungkah

P. Nasiam sanina na hinaholongan,

Bani partonggoan na patoluhon on iondolhon do banta tema “Rumahtangga Mardalan Riap Mangambilanhon”. Rumahtangga ai ma sada Kuria na etek (*Ecclesia Domestica*). Porlu tumang artini rumahtangga, aima gabe ianan na parlobei manubuhkon haporsayaon, holong ampa nilai-nilai Kristen. Rumahtangga ai ma sikolah parlahou bani niombah. Ibagas goluh na torus martambah maju on janah gok tantangan, rumahtangga Katolik idilo ase riap mardalan, marsiurupan, padaskon holong ni Naibata marhitei goluh ari-ari.

Marhitei partumpuan on, iarpakon do ase rumahtangga Katolik lambin margogoh bani goluh

martonggo, marsada ibagas holong, janah iojur mambaritahon Ambilan Na Madear, baik i tongah-tongah ni rumahtangga sonai age i tongah-tongah ni masyarakat. Tonggo i tongah rumahtangga aima sada cara na sederhana tapi mararti laho pataridahkon Naibata bani ganup pardalanan ni goluh rumahtangga.

4. Tonggo Pamungkah

P. Ham Bapa Naibata parholong, tarima kasih ma ihatahon hanami Bamu halani sibere-bere rumahtangga na pinaondoskon-Mu bannami. Idilo Ham do hanami ase rap mardalan ibagas holong, marsiurupan, lambin marbanggal haporsayaon hu Bamu. Togu-togu Ham ma hanami ale Bapa, ase riap sekeluarga, margogoh hanami marsipatogu-toguan ampa marsibagi holong-Mu samah hanami marhitei hata ampa parlahounami ari-ari. Ajari Ham ma hanami ase setia ibagas tonggo, toruh maruhur mangidangi, janah parholong mandompakkon sagala tantangan bani goluh on. Useihon Ham ma Tonduy-Mu na Pansing in ase ganup rumahtangga nami gabe tanda ni hadirion-Mu na manggoluh, gabe panondang pakon garam bani na legan, janah setia bani pandiloon mangambilankon Ambilan Na Madear.

Marhiteihon Tuhannami Jesus Kristus, Anak-Mu, na manggoluh anjaha manrajai rup pakon Ham ibagas parsaoan pakon Tonduy Napansing, Naibata, ronsi sadokah ni dokahni.

U. Amen.

5. Sibasaon Humbani Injil Matius 28:16-20

P. Itangar hita ma hata ni Tuhan mangihutkon Matius

P. Sonaima hata ni Tuhan

P. Puji-pujian ma Bamu ale Kristus

6. Ambilan

Nasiam hasoman na hinaholongan, Ambilan Na Madear sadari on pataridahkon hubanta sada na masa na ponting aima suruhan ni susian marhitei Jesus. Na menarik aima sanggah iidah susian ai Jesus na dob puho, isombah sidea do Ia, tapi adong do homa na sangsi ope. Hunjon taridah bahasa haporsayaon lang sai mardalan dear. Gari susian pe ra do sangsi. Tapi, Jesus lang manulak atap mandaoh humbani halak na sangsi.

Sebaliknya, idohori do sidea. On ma holong ni Naibata: Roh do Ia justru bani hagalekon ampa hahuranganta. Hunjai ibotoh hita bahwa Naibata lang manuntut kesempurnaan, tapi hasirsiron manghaporsayai ampa mardalan riap pakon-Si.

Dob ai ibere Jesus ma sada tugas na tangkas tumang: “Laho ma hanima, podahi hanima ma sagala bangsa ase gabe susianKu .” Parentah on lang pitah bani susianni ijia, tapi dihut do hubanta haganupan, tarmasuk rumahtangga Katolik sonari on. Rumahtangga idilo gabe ianan na parlobei mambaritahon haporsayaon ijai iajarhon janah ihagoluhkon holong, hasasapan ni dousa ampa haporsayaon bani Naibata iajari anjaha ihagoluhkon ari-ari; rumahtangga aima sikolah na parlobei bani

dakdanak janah orang tua aima guru na parlobei bani dakdanak.

Gati do ninuhurta mangambilankon Ambilan Na Madear ningon ihorjahon humbani na daoh atappe marhitei pambahenan na banggal. Sasintongni, parambilanon na tang sasintongni imulaini humbani parkara-parkara na etek aima: marsihaholongan, marsitangi-tangian, rap martonggo, janah gabe usihan na dear bani goluh i tongah-tongah ni rumahtangga.

Ijanjihon Jesus do homa na boi patoguhkon uurni, “Sai hasomanan-Ku do hanima tongtong ronsi roh ujung ni dunia on.” Artini, lang onga hita punjung mandalankon horja on. Bani ganup usaha na etek na ihorjahon hita laho manggoluh ibagas holong ampa mangambilanhon hadearon, totap do Naibata roh janah mangkasomani.

Arap uhurta marhiteihon Hata on, lambin margogoh ma hita selaku rumahtangga Katolik laho riap mardalan, marsiurupan, anjaha barani mangambilanhon holong ni Kristus bani goluh ari-ari.

7. Manluarho Pandapot ampa Pangahap (Sharing)

P. Sonari pabagas hita ma ambilan on marhitei

sungkun-sungkun na i toruh on laho manogu-nogu mambagihon pangalaman.

1. Menurut nasiam aha do artini “mangambilanhon” bani goluh siganup ari?
2. Aha do na dob ihorjahon ham bani rumahtanggamu laho pararatkon damei pakon holong ni Kristus?
3. Domma gabe hasomalan i tongah-tongah ni rumahtangga riap mangan, martonggo, pakon

mambasa Bibel?

4. Aha do tantangan na banggal bamu laho pararatkon holong ni Kristus?

8. Mambahen Panriahan Laho Patorsahon (Aksi Nyata)

- P. Riap mardalan ibagas haporsayaon marhitei tonggo na gabe kuasa mambaritahon Songon susian na roh hubani Jesus, iontang do homa rumahtangga ase tongtong roh hubani Naibata marhitei tonggo riap. Humbani tonggo on ma rumahtangga ai dapotan gogoh laho mandalankon suruhan: “Laho ma hanima, podahi hanima ma sagala bangsa gabe susianku”. Jadi, tonggo do gabe sumbul laho mangambilanhon holong ni Naibata.
- P. Mangambilanhon marhitei goluh siganup ari pori pe adong hagalekon ampa keraguan. Hita totap do isuruh age pe dong keraguan ni sidea. Sonai ma hita totap idilo mangambilankon Ambilan Na Madear marhitei holong, hasasapan ni dousa ampa pansarihonon. Bani pargoluhon siganup ari, rumahtangga gabe saksi ni Kristus marhitei pambahenan na konkrit, sekaligus porsaya bani bagah-bagah-Ni: “Huhasomani do hanima tongtong”.

9. Tonggo Pangindoan

- a. **Hubani Pamimpin Kuria,** Ale Bapa Pargogoh Na So Tarimbang in, itonggohon hanami do Paus, Uskup, malim pakon haganup pangurus Kuria.

Useihon Ham ma Tonduy-Mu na Pansing in bani sidea, ase totap sidea setia bani pandiloon ni sidea gabe parmahan bani umat-Mu. Patoguh Ham ma sidea ibagas haporsayaon, patoguh ma sidea ibagas pangarapan, goki ma sidea ibagas holong ibagas pangidangion. Andohar ma marhitei usihan ni goluh ni sidea lambin margogoh janah marhasadaon jolma in ibagas holong ni Kristus.

Riap ma hita mangelekhon...

- b. **Bani Pemimpin Pakon Pembuat Kebijakan Negara**, Ham Bapa na markuasa, itonggohon hanami do pemimpin pakon pembuat kebijakan negara. Bere Ham ma bani sidea hauhuron, habujuron ampa uhur na bulus ase margogoh sidea mandalankon tugasni ibagas na pintor, mangutamahon hadearon ni rayat, janah manjaga hasadaon ampa hadameion.

Riap ma hita mangelekhon...

- c. **Bani Na Mangambilanhon Injil**, Ham Bapa Pargogoh na so tarimbang, itonggohon hanami ma na mangambilanhon Injil, missionaris age halak na porsaya na sinuruh. Pargogohi Ham ma sidea marhitei Tonduy-Mu na Pansing ase setia bani suruhanni, barani mandompakkon tantangan, ringgas mangambilanhon holong ni Kristus marhitei hata pakon pambahenan.

Riap ma hita mangelekhon...

- d. **Bani Hita Hanganup na martuppu on**, Ham Bapa Pargogoh Na So Tarimbang, itonggohon hanami do hanami hanganup na martuppu ijon.

Patoguh Ham ma haporsayaonnami, pasada Ham ma hanami ibagas holong, urupi Ham ma hanami ase setia manggoluh domu hubani rosuh-Mu janah barani mangambilankon holong ni Kristus bani goluhnami ari-ari.

Riap ma hita manglekhon...

P. Riap ma hita martonggo “Tonggo Sinode Keuskupan VII Keuskupan Agung Medan”. (Hal 2)

10. Tonggo Ham Bapanami

P. Padomu hita ma tonggo pangindoan on pakon tonggo na niajarhon ni Jesus sandiri: Ham Bapanami na i nagori atas...

11. Kolekte

PNB No. 254: "Sai Jalo Ham Siluahnami"

12. Tonggo Penutup

P. Allah Ham Bapa Naibata parholong, diateitupa ma ihatahon hanami Bamu halani hasadaon nami bani partuppuan on. Domma ibogei hanami hata-Mu anjaha domma martonggo hanami hu Bamu. Sai ipargogohi Ham ma haporsayaonnami, pasada Ham hanami ibagas holong, janah ipargogohi Ham ma hanami ase setia mandalankon pandiloonnami aima sada rumahtangga na riap mardalan mangambilankon holong-Mu samah hanami bani pargoluhonnam ari-ari. Ihasomani Ham ma hanami bani ganup langkah ni goluh nami, ase tongon-tongon hanami manghagoluhkon aha na dob ihamalaskon uhur nami ibagas horja siganup ari. Marhitehon Kristus Tuhannami

U. Amin

13. Pasu-Pasu

P. Tuhan in manghasomani hita

U. Sonari das ronsi sadokah ni dokahni

P. Sai ipargogohi, ihasomani, ipatoguh janah ipasu-pasu Naibata Pargogoh na so tarimbang ma hita ase gabe keluarga na mardalan rup mangambilanhon ibagas goran ni Bapa, pakon Anak ampa Tonduy Napansing.

U. Amen

P. Nasiam sanina na hinaholongan, marhiteihonni ai partumpuan na parlobei na martemahon Keluarga mardalan rup laho mambaritahon domma salosei.

U. Tarima kasih ma bani Naibata

14. Doding Panutup

PBN No. 692 : "Riap Hita Janah Sauhur"/ "Doding Sinode"

PERTUPPUA PAOMPATHON
RUMAHTANGGA KATOLIK NA MARDALAN
RIAP AMPA MARKARAKTER

1. Lagu Pembukaan

PBN No. 588 : "Bamu, O Naibatanku"

2. Tanda Silang

P. Ibagas goranni Bapa, pakon Anak pakon Tonduy
Napansing

U. Amen

P. Idop ni uhur ampa damei humbani Naibata Bapanta
ampa humbani Tuhanta Jesus Kristus
menghasomani hita

U. Sonari das ronsi sadokah ni dokahni

3. Hata Pamungkah

P. Nasiam sanina pakon botou na hinaholongan
ibagas Kristus, Sadari on martumpu use hita laho
manoruskon partumpuanta laho
mamparimbagaskon tema na paompatkon. Paima
masuk bani tema paompatkon, idingat hita ope
aha do Tema 1, 2, pakon 3? (sai ibere ma panorang
hubani umat laho mambalosi) Dear, tema na
paompatkon na laho iulas hita sadari on aima:
RUMAHTANGGA KATOLIK MARDALAN
RIAP AMPA MARKARAKTER. Tema on aima
puncak humbani tema-tema sebelumnya.
Rumahtangga Katolik mardalan riap ampa
markarakter aima rumahtanga na riap mardalan
manangihon hasoman pakon sora ni Naibata,

rumahtangga na marsipatoguh-toguhon age pe ibagas hagalekon, pakon rumahtangga na mampu mangambilanhon hasaksian goluhni domu hubani Hata ni Naibata, sonai homa rumahtangga na taratur janah boi ijalo ganup pagori ni rumahtangga. Marhiteihon pambahasan pasal tema on, iarapkon do ase haganup halak Katolik na adong i Keuskupan Agung Medan gabe rumahtangga na manghagoluhkon nilai-nilai ambilan na madear, ase margogoh ma sidea mangambilanhon hasaksian goluhni bani pargoluhonni ari-ari.

4. Tonggo Pamungkah

P. Ham, Naibata Bapa na gok holong, idilo Ham do hanami ase manggoluh songon sada keluarga ibagas holong ampa hasadaon. Useihon Ham ma Tonduy-Mu na Pansing in bannami, ase boi hanami patubuhkon buahni Tonduy in bani goluh parrumahtanggaonnami: aima holong, malas ni uhur, damei, hasabaron pakon panrajaion diri. Togu-togu Ham ma hanami ase gabe sada keluarga sinodal janah marbiak na riap mardalan ibagas sondang ni holong-Mu. Marhiteihon Tuhannami Jesus Kristus, AnakMu, na manggoluh anjaha manrajai rap pakon Ham ibagas parsaoan ni Tonduy Napansing, Naibata, sadokah ni dokahni.

U. Amen.

5. Sibasoan humbani Suratni Apostel Paulus Hubani Umat I Galatia 5:16-26

L. Riap ma hita manangihon Hata ni Tuhan humbani
Surat ni Apostel Paulus hubani Umat i Epesus.

L. Sonai ma Hata ni Tuhan

U. Tarimakasih ma bani Naibata

6. Ambilan

Nasiam hasoman keluarga na hinaholongan, rumahtangga aima sikolah na parlobei janah na sipontingan ija nilai-nilai karakter iajarhon hubani dakdanak. Anggo rumahtanga jadi sada sikolah, halai ai orang tua jadi guru ma bani sidea. (Sadalan do in bani Tolu Tugas ni Orang Tua, aima sebagai Guru, Malim, pakon Parmahan). Gabe guru i tongah-tongah ni rumahtangga, tontu lang pitah mangajarhon nilai-nilai karakter hubani dakdanak, tapi dihut do homa mangajarhon nilai-nilai haporsayaon.

Nilai-nilai ponting ni haporsayaon na maningon isuankon hubani dakdanak aima songon na isobut bani Hata ni Naibata na baru ope itangar hita rap, na ikutip humbani Buku Galatia 5: 16-26, khususni bani ayat 22-23, aima, “Tapi Buah ni Tonduy aima: Holong, Malas ni Uhur, Damei, Habasaron, Hasabaron, Idop ni uhur Hadearon, hasetiaon, Halamlamon, Panrajaion diri...”.

Hata ni Naibata sadari on paingatkon hita bahwa rumahtangga na manggoluh ibagas Tonduy Napansing pasti do mamparbuahkon buah-buahan na jenges. Hata ni Naibata on pe mangondolhon bahasa “Buah ni Tonduy” aima siah biak na maningon ipataridahkon halak na ibobai Tonduy. Sasintongni, ayat on manggambarhon bahwa biak ni Kristus sedo

pitah aturan atap pambahenan sipakulah-kulah, tapi sebalikni tanda ni sasahalak na sintong-sintong porsaya domma iubah Tonduy. Buah ni Tonduy mangajarhon bahwa biak na sintong lang jadi pitah marhitei aturan atappe tekanan sosial, tapi marhitei hasadaon na manggoluh pakon Naibata do.

Hata ni Naibata na mangondolhon Bibel bani rumahtangga Katolik na markarakter. Jadi, sada rumahtangga Katolik na bersifat sinodal pakon berkarakter boi irumuskon songon on: Sada keluarga Katolik na marsitangi-tangian pakon manangar sora ni Naibata, marsiurupan bani panorang hagalekon, pakon mampu mambaritahon nilai-nilai haporsayaon bani goluh na konkret, pakon manghagoluhkon buah ni Tonduy pakon parlahou na isepakati riap pagori ni rumahtangga, janah boi do homa gabe sitiruon bani sada rumahtangga na legan. Intini, bahwa keluarga na markarakter aima: paramangon na markarakter, parinangon na markarakter, niombah na markarakter, sonai age rumah tangga na marsahap dihut mandukung pangisini ase gabe berkarakter.

7. Manluarhon Pandapot ampa Pangahap (Sharing)

P. Sonari pabagas hita ma renungan on marhitei sungkun-sungkun na i toruh on laho manogu-nogu mambagihon pangalaman.

1. Buah ni Tonduy na ija do na paling borat idalankon bani rumahtangga nta?
2. Aha do tantangan na banggal laho manjaga hadameion ibagas rumahtangga ?

3. Sonaha do gambaranni: paramangon na markarakter, parinangon markarakter, niombah markarakter?
4. Langkah-langkah na etek aha do na boi ibahen secara konsisten laho mambahen sada rumahtangga na markarakter?

8. Mambahen Panriahan Lahe Patorsahon (Aksi Nyata)

Dobkansi iulas hita tema na paompatkon on, aha do na na konkrit boi ibahen hita?

Misalni :

1. Mambahen panorang tonggo rumahtangga
2. Mambahen perjanjian rumahtangga
3. Mangatur horjani pagori ni rumahtangga

9. Tonggo Pangindoan pakin Tonggo Sinode

a. Hubani Pamimpin Kuria

Ham Bapa Paridop ni uhur na tarsulur in, martarimakasih do hanami bani pemimpin kuria nami na dob mangondoskon dirini gabe juak-juak bani bangsa-Mu. Bere Ham ma bani sidea buah ni Tonduy ase lambin margogoh sidea padaskon holong-Mu bani goluh ni sidea, janah boi gabe siusihan bannami.

Riap ma hita mangelekhon...

b. Bani Pamimpin Negara

Ham Bapa na Sumbul Hapentaran, useihon Ham ma Tonduy hapentaran-MU hubani Pamimpin Negara pakon bangsanami ase tongtong sidea marhorja laho mangondolhon hadearon pakon

haadilan bani rayat simbuei. Janah bere ham ma semangat bani sidea ase tongtong sirsir sidea mamparjuangkon hamajuon ni bangsa pakon negaranami.

Riap ma hita manglelekhon...

c. Bani Rumah tangga

Bapa, umbul ni sagala hadearon, pasu-pasu Ham ma haganup rumahtangga na adong i samping nami. Togu Ham ma hanami ase boi hanami marsitangi-tangian, mampargogohi ampa mangambilanhon, sonai homa margogoh manghagoluhkon Buah ni Tonduy-Mu, ase gabe rumahtangga na marparlahou janah siusihan bani hanami rumahtangga na legan iinggot nami.

Riap ma hita manglelekhon...

d. Pangindoan ni lingkungan...

P. Riap ma hita martonggo “Tonggo Sinode Keuskupan VII Keuskupan Agung Medan” (Hal 2)

10. Tonggo Ham Bapanami

P. Padomu hita ma tonggo pangindoan on pakon tonggo na niajarhon ni Jesus sandiri: Ham Bapanami na i nagori atas...

11. Kolekte

PBN No. 254: "Sai Jalo Ham Siluahnami"

12. Tonggo Panutup

P. Tarima kasih pakon diateitupa ma ihatahon hanami Bamu Bapa, domma itogu-togu Ham hanami bani partumpuan bodari on. Andohar ma marhitei Hata-Mu lambin margogoh ma rumahtangga nami. Janah andohar marhitei na riap mardalan, lambin

marhasadaon janah mardamei ma hanami. Ganupan
in ipindo hanami, Marhitei Kristus Tuhannami.

U. Amen

13. Pasu-Pasu

P. Tuhan in manghasomani hita

U. Sonari das ronsi sadokah ni dokahni

P. Sai ipargogohi, ihasomani, ipatoguh janah ipasu-
pasu Naibata Pargogoh na so tarimbang ma hita
ase gabe rumahtangga na markarakter ibagas
goran ni Bapa, pakon Anak ampa Tonduy
Napansing.

U. Amen

P. Nasiam sanina na hinaholongan, marhiteihon on
partumpuan na paompathon na martemahon
rumahtangga mardalan riap ampa markarakter
domma salosei.

U. Tarima kasih ma bani Naibata

14. Doding Panutup

PBN No. 582: "Riap Hita Janah Sauhur"/ "Doding
Sinode"